

心意品第十一 十有三章

心意品者。說意精神雖空無形造作無竭。

意使作猶	難護難禁	慧正其本
其明乃大	輕躁難持	唯欲是從
制意為善	自調則寧	意微難見
隨欲而行	慧常自護	能守即安
獨行遠逝	覆藏無形	損意近道
魔繫乃解	心無住息	亦不知法
迷於世事	無有正智	念無適止
不絕無邊	福能過惡	覺者為賢
佛說心法	雖微非真	當覺逸意
莫隨放心	見法最安	所願得成
慧護微意	斷苦因緣	有身不久
皆當歸土	形壞神去	寄住何貪
心豫造處	往來無端	念多邪僻

自為招惡	是意自造	非父母為
可勉向正	為福勿回	藏六如龜
防意如城	慧與魔戰	勝則無患